



**JUDICIAL SYSTEM MONITORING PROGRAMME**  
**PROGRAMA MONITORIZASAUN BA SISTEMA JUDISIÁRIU**

*Komunikadu Imprensa*  
*Tribunál Distritál Dili*

*19 Novembru 2014*

**Vizita Primeiru Ministru ba Tribunál Distritál Dili bele hamosu  
pergunta oioin**

Iha 18 Novembru 2014, Primeiru Ministru (PM), Xanana Gosmão hala’o vizita ba Tribunál Distritál Dili.

Iha vizita ne’e Primeiru Ministru hasoru direktamente ho juis administradór Tribunál Distritál Dili, Dr. Duarte Tilman no sorumutu ne’e taka ba públiku.

JSMP observa katak antes vizita, iha area Tribunál Distritál Dili nakonu ho seguransa husi polísia no seguransa sivil sira. Entidade seluk hanesan jornalista nasional no internasionál, membru Parlamentu, membru Governu, sosiedade sivil no comunidade balun mós marka prezensa iha tribunál.

Depoisde vizita ne’e, Dr. Duarte Tilman, haktuir katak prezensa Primeiru Ministru iha tribunál ho objetivu entrega dokumentu ba Tribunál Distritál Dili relasiona ho kazu balun ne’ebé sei iha prosesu inkeritu hela. Aleinde ne’e, nia haktuir katak, vizita ne’e hanesan mós enkoraza tribunál atu kontinua servisu ho independente. Iha enkontru ne’e, Primeiru Ministru haktuir katak Governu respeita desizaun tribunál no respeita prinsipiu separasaun poder iha Konstituisaun RDTL.

“JSMP hanoin katak prezensa Xefe Governu iha tribunál bele hamosu interpretasaun no pergunta oioin kona-ba independensia sistema judisiáriu no prinsipiu separasaun poder ne’ebé hatur iha Konstituisaun RDTL”, dehan Diretór Ezekutivu JSMP, Luis de Oliveira Sampaio.

Antes ne'e, iha 24 no 30 Outobru 2014, Parlamentu Nasional (PN) no Governu hasai rezolusaun tolu tuir-malu kona-ba auditoria ba setór justisa no terminasaun kontratu ba autór judisiáriu internasionál sira. Rezolusan sira ne'e kontinua iha debate no ema barak kestiona hela nia legalidade no konstitusionalidade inklui pozizaun forte hosi tribunál rasik katak rezolusaun sira ne'e la iha efeitu/forsa legal atu implementa.

Aleinde ne'e, Primeiru Ministru sai iha programa debate ka entrevista iha televizaun ne'ebé halo kritika makas ba desiaun tribunál no inkapasidade juis sira nian, halo vizita ne'e, bele kontinua hamosu pergunta barak iha sosiedade no parseiru estratejiku sira ne'ebé durante ne'ebé apoiu no investe ba setór justisa iha Timor Leste.

JSMP observa katak rezolusaun Governu no Parlamentu hodi hapara kontratu juis internasionál prejudika servisu tribunál nian, tanba purzemplu iha kazu lubuk ida ne'ebé tribunál tenki halo adiamentu.

JSMP apresia teb-tebes Primeiru Ministru nia deklarasaun kona-ba respeita desizaun tribunál no prinsipiu separasaun poder. Tanba ne'e, JSMP enkoraza Governu no PN atu husik tribunál sira halao sira nia knaar ho livre sein presaun no interferensia ba funksionamentu setór justisa. Tanba instituisaun judisiáriu sira nu'udar pilar xave iha estadu demokrátiku no parte integral hosi interese nasional Estadu Timor-Leste nian.

JSMP preukupa tanba vizita PM ho movimentu apoiantes barak iha tribunál, psikolojikamente efeita servisu tribunál no autoridade judisiáriu sira seluk, satan prezensa ne'e sein notifikasaun ofisial hosi tribunál. JSMP enkoraza autoridade estadu tomak atu kontribui ba hametin funksionamentu tribunál nu'udar instituisaun demokrátiku ida iha Timor-Leste.

Atu hetan tan informasaun, favór ida kontaktu:

Luis de Oliveira Sampaio  
Diretór Ezekutivu JSMP  
E-mail: [luis@jsmp.minihub.org](mailto:luis@jsmp.minihub.org).  
[info@jsmp.minihub.org](mailto:info@jsmp.minihub.org)

Telephone: +670 3323883 | +670 77257466

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPtl